

**Ո Ր Ո Շ ՈՒ Մ 916/1**  
**Վարչական տույժ նշանակելու մասին**

«18» ապրիլի 2023թ.

ք.Երևան

ՀՀ ՊԵԿ Երևանի մաքսային սպասարկման կենտրոն-մաքսատուն, վարչության պետի տեղակալ Աղասի Աղայանս, քննելով Վարյա Հովհաննիսյանի (անձը հաստ. փաստ.՝ AV0419833, տրված 13"09"2022թ" 008-ի կողմից, հասցե՝ ք. Երևան, Անդրանիկի փ., 112 շենք, 27 բն.) նկատմամբ սկսված մաքսային կանոնների խախտման վերաբերյալ գործը՝

**Պ Ա Ր Զ Ե Ց Ի**

Վարյա Հովհաննիսյանի անվամբ 20.03.2023 թվականին թիվ 05100033/200323/0022847 տարանցման հայտարարագրով «Մաքսային տարանցում» մաքսային ընթացակարգով ձևակերպվել են ապրանքներ և տարանցման վերջնաժամկետ է սահմանվել՝ 24.03.2023 թվականը: Փոխադրող անձ՝ Վարյա Հովհաննիսյանը մաքսային հսկողության ներքո փոխադրվող ապրանքները մաքսային մարմնի սահմանած ժամկետում մաքսային մարմին չի չհասցրել:

Դեպքի առթիվ 03.04.2023թ-ին փոխադրող անձի՝ Վարյա Հովհաննիսյանի նկատմամբ կազմվել է մաքսային կանոնների խախտման վերաբերյալ արձանագրություն Մաքսային կարգավորման մասին ՀՀ օրենքի 305 հոդվածի հատկանիշներով:

Մաքսային կանոնների խախտման վերաբերյալ գործի քննությունը նշանակվել է 14.04.2023 թվականին ժամը 10:00-ին, ինչի անցկացման վայրի և ժամանակի մասին սահմանված կարգի համաձայն Վարյա Հովհաննիսյանը ժամանակին ծանուցվել է:

14"04"2023թ" Վարյա Հովհաննիսյանը միջնորդագիր է ներկայացրել գործի քննությունը հետաձգելու մասին, որը բավարարվել է և քննությունը նշանակվել է 18"04"2023թ" ժամը 14:30-ին:

18"04"2023թ" նիստին Վարյա Հովհաննիսյանը ներկայացել է լիազոր անձ, փաստաբան Լեոնիկ Ռոբերտի Հովհաննիսյանի (արտոնագիր թիվ 568) ուղեկցությամբ, ով նիստի ընթացքում միջնորդել է սույն գործի վարույթը կարճել, քանի որ՝ մեջբերում «""մաքսային կանոնների խախտման վերաբերյալ 03"04"2023թ" արձանագրությունում արձանագրված մաքսային կանոնների խախտման նկարագիրը որևէ աղերս չունի իրականության հետ, մասնավորապես՝ թիվ 05100033/200323/0022847 տարանցիկ հայտարարագրով իմ անունով ՀՀ տրանսպորտային միջոց չի ներմուծվել և այն ուղեկցող փաստաթղթեր չի տրամադրվել, հետևապես տրանսպորտային միջոցի փաստաթղթեր մաքսային մարմին չեն ներկայացնելու մասին արձանագրված տեղեկությունները այն է՝ իրավախախտման փաստը, բացակայում է և Վարչական իրավախախտումների վերաբերյալ ՀՀ օրենսգրքի 247-րդ հոդվածի 1)-ին մասի հիմքով (բացակայում է վարչական իրավախախտման դեպքը) վարչական իրավախախտման գործի վարույթը ենթակա է կարճման» մեջբերման ավարտ:

Եվրասիական տնտեսական միության մաքսային օրենսգրքի 143 հոդվածի համաձայն՝ ապրանքները «մաքսային տարանցում» մաքսային ընթացակարգով ձևակերպելիս ուղարկող

մաքսային մարմինը սույն Օրենսգրքի 144-րդ հոդվածին համապատասխան սահմանում է մաքսային տարանցման ժամկետը: Նույն Օրենսգրքի 145-րդ, 263-րդ և 304-րդ հոդվածներին համապատասխան որոշում է ապրանքների առաքման վայրը: Նույն Օրենսգրքի 341-րդ հոդվածին համապատասխան իրականացնում է ապրանքների, դրանց փաստաթղթերի նույնականացումը: Նույն օրենսգրքի 144-րդ հոդվածի համաձայն ապրանքները «մաքսային տարանցում» մաքսային ընթացակարգով ձևակերպելիս ուղարկող մաքսային մարմինը սահմանում է այն ժամկետը, որի ընթացքում ապրանքները ուղարկող մաքսային մարմնից պետք է հասցվեն նշանակման մաքսային մարմնին (այսուհետ՝ մաքսային տարանցման ժամկետ):

Մաքսային կարգավորման մասին ՀՀ օրենքի «Մաքսային կանոնների խախտման վերաբերյալ վարույթի առանձնահատկությունները» վերտառությամբ 322 հոդվածի 1-ին մասի համաձայն՝ մաքսային ոլորտում սույն օրենքի 58-րդ գլխով նախատեսված մաքսային կանոնների խախտման վերաբերյալ գործերի վարույթը կարգավորվում է սույն գլխով և Վարչական իրավախախտումների վերաբերյալ Հայաստանի Հանրապետության օրենսգրքի սույն գլխին չհակասող մասով:

Մաքսային կարգավորման մասին ՀՀ օրենքի 325 հոդվածի 2-րդ մասի համաձայն՝ մաքսային կանոնների խախտումների վերաբերյալ կազմված արձանագրության մեջ նշվում են **Վարչական իրավախախտումների վերաբերյալ ՀՀ օրենսգրքի 255-րդ հոդվածով նախատեսված տեղեկությունները**, առկայության դեպքում՝ էլեկտրոնային փոստի հասցեն, ինչպես նաև մաքսային իրավախախտման մանրամասն նկարագիրը և արարքի վերաբերյալ նախնական որոշումը՝ ըստ Միության մաքսային օրենսգրքի և սույն օրենքի համապատասխան հոդվածի, տեղեկություններ՝ վերցված առարկաների և փաստաթղթերի մասին, ինչպես նաև գործի համար կարևոր նշանակություն ունեցող այլ հանգամանքներ:

Վարչական իրավախախտումների վերաբերյալ ՀՀ օրենսգրքի 255-րդ հոդվածի համաձայն՝ վարչական իրավախախտման վերաբերյալ արձանագրության մեջ նշվում է՝ դրա կազմելու ամսաթիվն ու տեղը, արձանագրությունը կազմող անձի պաշտոնը, անունը, հայրանունը, ազգանունը. տեղեկություններ խախտողի անձի մասին. վարչական **իրավախախտման** կատարման տեղը, ժամանակը և **էությունը**. այն նորմատիվ ակտը, որը պատասխանատվություն է նախատեսում տվյալ իրավախախտման համար. վկաների և տուժողների ազգանունները և հասցեները, եթե այդպիսիք կան. խախտողի բացատրությունը. **գործի լուծման համար անհրաժեշտ այլ տեղեկություններ**:

Ինչ վերաբերում է Մաքսային կարգավորման մասին ՀՀ օրենքի 325 հոդվածի 2-րդ մասով սահմանված մաքսային **իրավախախտման մանրամասն նկարագրի առկայությանը**, ապա, այն չի կարող համարվել պարտադիր պայման, քանի որ վերոնշյալ նորմի կանոնակարգմամբ այն հիմնական պայմանից (այն է Վարչական իրավախախտումների վերաբերյալ ՀՀ օրենսգրքի 255-րդ հոդվածով նախատեսված տեղեկությունները) առանձնացված է «ինչպես նաև» բառով, իսկ «Նորմատիվ իրավական ակտերի մասին» ՀՀ օրենքի 16-րդ հոդվածի 7-րդ մասի ուժով, եթե նորմատիվ իրավական ակտում նշված նորմի կիրառումը պայմանավորված է «ինչպես նաև» բառերով բաժանված պայմաններով, ապա «ինչպես նաև» բառերից հետո շարադրված պայմանները համարվում են նախկին պայմանների հետ չկապված պայմաններ:

Արձանագրությունում մաքսային կանոնների խախտման համառոտ նկարագրության մեջ մաքսային տեսուչ Ն"Կիրակոսյանի կողմից նշվել է՝ մեջբերում «Թիվ 05100033/200323/0022847 տարանցիկ հայտարարագրով Վարյա Հովհաննիսյան-ի անունով ՀՀ ներմուծված տրանսպորտային միջոցը և ուղեկցող փաստաթղթերը սահմանած ժամկետում մաքսային մարմիններին չի ներկայացվել» մեջբերման ավարտ:

Տվյալ դեպքում իրավախախտման էությունը կայանում է նրանում, որ Վարյա Հովհաննիսյանը, իր անվամբ թիվ 05100033/200323/0022847 տարանցման հայտարարագրով Բագրատաշենի մաքսային կետ-բաժին անցակետով ՀՀ տարածք ներմուծված 5,5 կգ համաքաշով ապրանքը մաքսային մարմնի սահմանված ժամկետում առաքման վայր չի չհասցրել:

Արձանագրությունում մաքսային կանոնների խախտման համառոտ նկարագրության մեջ նշված թիվ 05100033/200323/0022847 տարանցման հայտարարագրում առկա են բավարար տեղեկություններ Վարյա Հովհաննիսյանի անունով ՀՀ ներմուծված ապրանքների, առաքման վայրի և տարանցման վերջնաժամկետի վերաբերյալ, որպիսի պայմաններում ամբողջությամբ բացահայտվում է իրավախախտման էությունը:

Ավելին գործի նյութերում առկա է նաև Վարյա Հովհաննիսյանի գրավոր «Հայտարարություն»-ն այն մասին, որ իր կողմից ՀՀ է ներմուծվել 5,5 կգ հագուստ, խնդրում է հետագա մաքսային ձևակերպումներն իրականացնել Մետեքսիմ մաքսային պահեստում:

Վարյա Հովհաննիսյանի նկատմամբ մաքսային կանոնների խախտման վերաբերյալ 03.04.2023թ. կազմված արձանագրությունը պարունակում է ՀՀ օրենսդրությամբ սահմանված **(գործի լուծման համար անհրաժեշտ)** տեղեկությունները և արձանագրությունում մաքսային կանոնների խախտման համառոտ նկարագրության մեջ «տրանսպորտային միջոցը» բառերից առաջ «ապրանքները կամ» բառերի բացակայությունը որևէ կերպ չի կարող բացառել իրավախախտման փաստը: Հետևապես՝ Լեոնիկ Հովհաննիսյանի պնդումն այն մասին, որ Վարյա Հովհաննիսյանի անունով տրանսպորտային միջոց ՀՀ չի ներմուծվել և ուղեկցող փաստաթղթեր չի տրամադրվել, հետևապես տրանսպորտային միջոցի փաստաթղթեր մաքսային մարմին չներկայացնելու մասին արձանագրված տեղեկությունները՝ իրավախախտման փաստը, բացակայում է, անհիմն է:

18"04"2023թ" նիստի ընթացքում Վարյա Հովհաննիսյանի կողմից ներկայացվել է նաև իր անձնագրի պատճենը՝ սահմանահատման կնիքներով, ըստ որի նա 20"04"2023թ" հատել է ՀՀ սահմանը դեպի Վրաստանի Հանրապետություն և վերադարձել է 27"03"2023թ, սակայն ՀՀ-ից նրա բացակայությունը ծայրահեղ անհրաժեշտության վիճակում կատարված լինելու մասին փաստեր չեն ներկայացվել:

ՀՀ մաքսային կարգավորման օրենքի 301 հոդվածի 1-ին մասի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն:

Նույն հոդվածի 2-րդ մասի համաձայն՝ ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային կարգավորման օրենքի 305-րդ հոդվածի համաձայն՝ Մաքսային հսկողության ներքո փոխադրվող ապրանքները կամ տրանսպորտային միջոցները կամ դրանք ուղեկցող փաստաթղթերը մաքսային մարմին չհասցնելը, մաքսային մարմնի սահմանած մաքսային տարանցման ժամկետը կամ տարանցման երթուղին չպահպանելը կամ ապրանքները կամ տրանսպորտային միջոցները մաքսային մարմնի սահմանած առաքման վայրից տարբերվող այլ վայր հասցնելը՝ առաջացնում է տուգանք՝ հարյուր հազար դրամի չափով:

Այսպիսով, մաքսային կանոնների խախտման գործի վարույթի նյութերով հիմնավորվում է, որ Վարյա Հովհաննիսյանը մաքսային հսկողության ներքո փոխադրվող ապրանքները մաքսային մարմնի սահմանած մաքսային մարմին չի չհասցրել, տարանցման ժամկետը չի պահպանել, ինչի արդյունքում կատարել է ՀՀ մաքսային կարգավորման օրենքի 305-րդ հոդվածով նախատեսված մաքսային կանոնների խախտում:

Ելնելով վերոգրյալից և ղեկավարվելով ՀՀ մաքսային կարգավորման օրենքի 305-րդ հոդվածով, 334-րդ հոդվածի 1-ին մասի 1-ին կետով, ՀՀ վարչական իրավախախտումների վերաբերյալ օրենսգրքի 32 և 234 հոդվածներով՝

#### Ո Ր Ո Շ Ե Ց Ի

1. ՀՀ մաքսային կարգավորման մասին օրենքի 305 հոդվածով նախատեսված մաքսային կանոնների խախտում կատարելու համար Վարյա Հովհաննիսյանի նկատմամբ նշանակել **տուգանք՝ 100.000 ՀՀ դրամի չափով:**

2. Որոշման պատճենը հանձնել կամ ուղարկել Վարյա Հովհաննիսյանին՝ պարզաբանելով, որ մաքսային կարգավորման մասին ՀՀ օրենքի 334-րդ հոդվածի 2-րդ մասով որոշումն ուժի մեջ է մտնում այն կայացնելու պահից և 4-րդ մասի համաձայն վարչական տույժ նշանակելու մասին մաքսային մարմինների որոշումը կարող է բողոքարկվել «Մաքսային ծառայության մասին» օրենքի 37-րդ հոդվածով սահմանված կարգով՝ մաքսային մարմնի բողոքարկման հանձնաժողով, այն ուժի մեջ մտնելու օրվանից երկու ամսվա ընթացքում կամ դատական կարգով:

3. Որոշմամբ նշանակված **տուգանքի վճարման հաշվեհամարն է՝ 900005024055-ը** (ՀՀ պետական բյուջե, կենտրոնական գանձապետարան, Երևանի մաքսային սպասարկման կենտրոն-մաքսատուն, վարչության, **ԿՈՂ 27**):

ԵՐԵՎԱՆԻ ՄԱՔՍԱՅԻՆ ՍՊԱՍԱՐԿՄԱՆ  
ԿԵՆՏՐՈՆ-ՄԱՔՍԱՏՈՒՆ, ՎԱՐՉՈՒԹՅԱՆ  
ՊԵՏԻ ՏԵՂԱԿԱԼ



ԱՂԱՍԻ ԱՂԱՅԱՆ